

Matvæla og þjónustudeild

Ágætu félagar!

Að venju verður á þessum aðalfundi farið yfir það helsta sem gerst hefur á liðnu starfsári sem var enn og aftur mjög óvenjulegt vegna Covid-19. Haldnir hafa verið fjórir stjórnarfundir frá síðasta aðalfundi deildarinnar, sem haldinn var rafrænt 4. febrúar 2021.

Óhætt er að segja að erfitt var að skipuleggja eitthvað á vegum deildarinnar þetta starfsárið vegna ástandsins í þjóðfélaginu.

Ýmis mál hafa verið rædd á fundunum, m.a. starfið innan deildarinnar, samningamál, starf félagsins vegna Covid-19, stöðuna á vinumarkaði, trúnaðarráð félagsins og margt fleira.

Ekki hefur komið til þess að félagið hafi þurft að loka skrifstofum félagsins á starfsárinu vegna Covid eins og síðast, en vegna ástandsins þá hvetjum við félagsmenn til að nýta sér síma, tölvupóst og vefsíðu Einingar-Iðju frekar en að mæta á skrifstofurnar ef hægt er.

Þann 1. janúar sl. hækkuðu kauptaxtar á almenna markaðinum um kr. 25.000 og almenn mánaðarlaun fyrir fullt starf hækkuðu um kr. 17.250. Aðrir kjaratengdir liðir kjarasamningsins hækkuðu um 2,5% á sömu dagsetningu. Einnig hækkuðu lágmarkstekjur fyrir fullt starf og verða 368.000 kr. á mánuði fyrir fullt starf frá 1. janúar 2022.

Ég vil biðja ykkur um að yfirfarið launaseðlana ykkar vandlega og bregðist við ef þið verðið vör við að umræddar launahækkanir hafi ekki skilað sér.

Undirbúningur fyrir næstu kjarasamninga er hafinn en stjórn félagsins samþykkti í ágúst í fyrra tillögu um ferlið. Tillagan var í nokkrum liðum og er nokkrum liðum hennar nú þegar lokið, m.a. að deildir komi með tillögur að fulltrúum í samninganefnd, að trúnaðarráð kjósi í nefndina og að halda vinnufund í samninganefndinni.

Rannsóknamiðstöð Háskólans á Akureyri mun gera könnun á meðal félagsmanna þar sem kannað verður hvaða áherslur félagið á að leggja á í næstu kjarasamningagerð. Kannanir sem þessi hafa gefið góða raun fyrir síðustu samningaviðæður, en með þessari aðferð hafa um og yfir 2.000 félagsmenn komið að undirbúningi félagsins.

Árlegur fræðsludagur Einingar-Iðju fyrir trúnaðarmenn, starfsmenn og aðra sem eru í trúnaðarstörfum fyrir félagið féll aftur niður vegna Covid og ekki er enn búið að ákveða nýja dagsetningu.

Í september átti að fara fram málefnahluti þings ASÍ sem sett var rafrænt í október árið á undan. Þá var þinginu frestað fram á vor og svo aftur til haustsins vegna Covid en vegna samkomutakmarkana og fjölda smita í samfélaginu var ákveðið að aflýsa málefnahluta þingsins og slíta þinginu. Eining-Iðja átti rétt á að senda níu fulltrúa á þingið og var ég einn af þeim.

Aðalstjórn félagsins ákvað að framkvæma aftur sambærilega kjara- og viðhorfskönnun eins og framkvæmd hefur verið ár hvert frá árinu 2011. Óhætt er að segja að mikil ánægja er með þjónustu félagsins og félagið sjálft. Niðurstöðu könnunarinnar má finna á heimasíðu félagsins.

Vert er að minna á að félagið er með samstarfssamning við SÍMEY sem er með það markmið að skapa enn fleiri möguleika fyrir félagsmenn Einingar-Iðju til að sækja sér fræðslu og auka við starfstengda hæfni sína. SÍMEY mun kappkosta að endurspeglar þarfir okkar félagsmanna varðandi símenntun.

SÍMEY býður upp á fjöldamörg námskeið sem eru bæði starfstengd og tengd áhugamálum hvers og eins. Fjöldmörg námskeið og námsleiðir eru í boði og geta áhugasamir m.a. kíkt á heimasíðu SÍMEY til að sjá hvað er í boði.

Félagsmenn geta skráð sig á nokkur vefnámskeið og nokkur styttri námskeið sér að kostnaðarlausu. Sem dæmi um slík námskeið á næstunni má m.a. nefna Persónuleg fjármál sem

verður 8. febrúar, Heilaheilsa og þjálfun hugans sem verður 16. og 23. febrúar og Hvort viltu vera gleðigjafi eða fýlupoki? sem verður 15. mars.

Í ljósi aðstæðna í íslensku samfélagi ákváðu stjórnir Landsmenntar, Ríkismenntar og Sveitamenntar snemma á árinu 2020 að rýmka úthlutunarreglur einstaklingsstyrkja í ákveðinn tíma. Hluti átaksins fólst í því að endurgreiðsluhlutfall styrkja hækkaði tímabundið úr 75% í 90% hjá bæði fyrirtækjum og til einstaklinga. Lokadagsetning átaksins hefur nokkrum sinnum verið breytt og nú ákváðu stjórnir sjóðanna að halda áfram með allt að 90% endurgreiðsluhlutfall til 1. maí 2022 og verður það þá endurskoðað aftur. Nánari upplýsingar um þetta má finna á heimasíðu félagsins.

Ég vil minna á að félagsmenn geta hvenær sem er haft samband við ráðgjafana í SÍMEY og fengið hjá þeim ókeypis ráðgjöf.

Ef einhverjir eru með hugmyndir að námskeiðum sem þeir hafa áhuga á, er um að gera að koma því á framfæri við Önnu varaformann félagsins.

Í fyrra voru í boði tvær ferðir hjá félaginu en vegna aðstæðna þurfti að hætta við aðra þeirra. Í ár voru í boði þrjár ferðir, en nú þegar er búið að hætta við utanlandsferðina. Skráning er hafin í innanlandsferðina, en farin verður dagsferð út í Flateyjarðal laugardaginn 27. ágúst. Ekki er eftir neinu að bíða með að skrá sig fyrir þá sem hug hafa á að fara með, því bæði er um að ræða lágmarks- og hámarksfjölda í ferðina. Síðar verður auglýst hvenær byrjað verður að skrá í hina árlegu eins dags ferð fyrir aldraða félagsmenn sem farin verður 23. júní. Í ár verður farið út í Hrísey.

Orlofsblaðið kemur út í mars en í sumar verður boðið upp á mikið úrval sumarhúsa eins og undanfarin ár.

Ég minni á varðandi sumarúthlutun orlofshúsa að eins og undanfarin ár verður einungis tekið við rafrænum umsóknum í gegnum orlofshúsavef félagsins. Á heimasíðu félagsins má finna hnapp inn á orlofshúsavefinn.

Ef einhver þarf á aðstoð að halda við að sækja um orlofshús eða Orlof að eigin vali þá er hægt að mæta á skrifstofurnar og fá aðstoð við það að sækja um.

Áfram verður hægt að kaupa niðurgreidda rafræna ferðaávisun á orlofsvef félagsins sem gildir á fjölmörg hótél og gistiheimili um allt land. Með því að skrá sig inn á orlofsvefinn má sjá hvaða gististaðir eru í boði og þar þarf að kaupa ávisunina sem er rafræn. Á sama stað verður áfram hægt að hægt að kaupa niðurgreidd útilegu- og/eða veiðikort.

Nú verður líka hægt að nota ferðaávisunina upp í gönguferðir, en búið er að semja við Ferðafélag Íslands, Útivist og Fjallafjör um að taka við Ferðaávisun stéttarfélagana. Félagsmenn njóta sérkjara á völdum ferðum en einnig má nota Ferðaávisun upp í hvaða ferð sem er á vegum þessara fyrirtækja.

Áfram verður boðið upp á Orlof að eigin vali. Styrkurinn í ár verður kr. 26.000 sem er hækkun um kr. 1.000 frá síðasta ári. Áfram verða í boði 300 styrkir eins og undanfarin ár. Sækja þarf um styrkinn á vef félagsins, eins og orlofshúsin. Síðasti umsóknardagur er 5. apríl nk.

Ég vil enn og aftur minna á heimasíðu félagsins, ein.is, þar sem má m.a. nálgast gagnlegar upplýsingar um félagið, kjaramál, fræðslumál og réttindi launafólks. Síðan er vel virk og vel sótt af félagsmönnum og öðrum. Hægt er að skrá sig á póstlista á síðunni og fá þannig nýjustu fréttir sem á hana koma.

Félagið er með virka síðu á Facebook svo þið megið alveg endilega gefa okkur eins og eitt like á þá síðu og svo er um að gera að deila henni svo fleiri félagsmenn viti af henni.

Svona áður en við förum að snúa okkur að stjórn deildarinnar og kosningum þá langar mig að vekja athygli á að á skrifstofu félagsins á Akureyri starfa fjórir ráðgjafar hjá VIRK

starfsendurhæfingarsjóði, þær, Helga Þyri sem jafnframt er verkefnastjóri á svæðinu, Kristín, Nicole og Svana. Þær eru starfmenn Einingar-Iðju, en starfa fyrir öll stéttarfélög á svæðinu.

Nicole er með fasta viðveru á skrifstofu félagsins á Dalvík á þriðjudögum og Svana er með fasta viðveru á skrifstofunni í Fjallabyggð á miðvikudögum.

Fyrir þá sem ekki vita þá er þjónusta VIRK fyrir einstaklinga sem búa við skerta starfsgetu vegna heilsubrests og stefna að aukinni þátttöku á vinnumarkaði. Til að eiga rétt á þjónustunni þarf einstaklingur að vera með vottaðan heilsubrest frá lækni í formi vottorðs eða beiðni læknis um þjónustu hjá VIRK. Það geta legið margar og ólíkar ástæður fyrir því að fólk falli út af vinnumarkaði og þarfnist starfsendurhæfingar. Kulnun í starfi, afleiðingar slysa og áfalla, eða andlegir sem líkamlegir sjúkdómar. Ef þið viljið fá nánari upplýsingar um VIRK þá má t.d. nálgast þær á heimasíðu félagsins.

Á starfsárinu sameinuðust Kjarnafæði, Norðlenska og SAH afurða eftir að skrifað var undir samkomulag um samruna í júlí 2020. Haft var eftir forsvarsmönnum fyrirtækjanna á þeim tímapunkti að ljóst væri að rekstrarskilyrði félaganna hafi versnað verulega á liðnum árum og auk þess hafa áhrif samdráttar í kjölfar COVID-19 gert þá stöðu enn þyngri. Jafnframt að sameining félaganna og sú hagræðing sem stefnt væri að með henni sé nauðsynleg svo standa megi vörð um þá mikilvægu framleiðslu og þá þjónustu sem félögin veita bændum, viðskiptavinum og neytendum. Mikið væri í húfi fyrir bændur, starfsfólk og viðskiptavinum fyrirtækjanna.

Kjarnafæði og Norðlenska höfðu átt í viðræðum um samruna frá því á haustmánuðum 2018 og hef ég trú á eftir þessa sameiningu standi öflugara fyrirtæki og vil ég óska eigendum og starfsmönnum til hamingju. Ég vona að við munum áfram eiga í góðum samskiptum.

Hér á eftir fer fram kosning stjórnar til næstu tveggja ára.

Í ár á að kjósa um varaformann og þrjá meðstjórnendur til tveggja ára. Einnig þarf að kjósa um einn meðstjórnanda til eins árs.

Ég vil þakka Sólveigu Auði, Guðmundi og Írisi Evu sem nú láta af stjórnarstörfum fyrir samstarfið á liðnum árum. Sólveig Auður og Guðmundur eru bæði farin úr félaginu og Íris Eva óskaði eftir að láta af trúnaðarstörfum fyrir félagið af persónulegum ástæðum. Ég vil þakka stjórninni fyrir vel unnin störf og ánægjulegt samstarf á starfsárinu. Ég vil einnig þakka öllum þeim sem ég hef starfað með á liðnu ári fyrir ánægjulegt samstarf og viðkynningu og þá ekki síst Önnu Júlíusdóttur, starfsmanni deildarinnar.

Takk fyrir.